

S C H O L I O N.

Catholicum dogma de vera & seria Ministri intentione hisce fere argumentis oppugnare solent juniores Hæretici. Quid, inquit, Romani Sophistæ jocosam, mimicam, & fictam intentionem explodere conantur? Sane *Augustinus* non reprobatur Baptismum mimicæ & joculariter administratum *l. 7. de Baptismo contra Donatistas*. Baptismum, ab Athanasio pûero pueris cum eo ludentibus collatum per jocum & irrisionem, ab Alexandrino Episcopo rati habitum referunt *Socrates*, & *Rufinus*. Pro vero & valido habitus est in Ecclesia Baptismus, quem Genesius, in Theatro Mimi personam agens, ad Christianæ Religionis derisionem, sibi conferri postulaverat. *S. Augustinus ipse Tract. V. in Joannem* baptismum a temulento datum approbavit; & ipsa Romana Ecclesia validam (quoad substantiam & characteris impressionem) existimavit Antipapæ Novatiani ordinationem, licet a tribus temulentis Episcopis manuum impositionem accepisset; ergo etiam jocosa & mimica intentio ad validitatem sufficit Sacramenti. At juxta cum ignarissimis sciunt juniores Hæretici, dum ita loquuntur: Primo enim *S. Augustinum*, fallaciæ & simulationis nomine, non internæ & veræ intentionis absentiam, sed fidei defectum intelligere, ex eodem *lib. 7. de Baptismo* satis aperte constat. Ipse autem *S. Doctor* de Baptismo mimice collato nihil decernit, sed expectandum dicit Spiritus Sancti Oraculum, & Ecclesiæ Matris definitionem. Quid igitur ad *Augustini* auctoritatem appellant post solemnem Ecclesiæ definitionem? II. Factum Athanasii, quod narrant *Socrates l. 1. Hist. c. 14. Sozomenus l. 2. c. 17. & Rufinus*, si ad severioris critices leges illud expendimus, falsum apparet. Alexander creatus est Episcopus Alexandrinus anno 312. Nicænum Concilium celebratum fuit A. C. 325. In hoc Concilio Athanasius erat Diaconus, & inter primi subsellii Theologos locum habebat; paulo post, mortuo Alexandro, anno 326. Athanasius ad Alexandrinam Sedem fuit evedtus; constant hæc omnia ex Chronologia *S. Hieronymi*. Jam vero si factum tanquam